

## AUGLÝSING

### um staðfestingu samþykktar fyrir Byggðasamlagið Hulu bs.

Ráðuneytið hefur staðfest meðfylgjandi samþykkt fyrir Byggðasamlagið Hulu bs. en að því eiga aðild sveitarfélögin Rangárþing eystra, Mýrdalshreppur og Skaftárhreppur.

Hlutverk Hulu er skv. stofnsamningi að annast urðun flokkaðs heimilissorps frá aðildarsveitarfélögunum, sem og öðrum aðilum á samlagssvæðinu, sem þess óska og ef stjórn Hulu samþykkir.

Byggðasamlagið er stofnað skv. 94. gr. sveitarstjórnarlaga nr. 138/2011.

*Samgöngu- og sveitarstjórnarráðuneytinu, 31. maí 2021.*

F. h. r.

**Hermann Sæmundsson.**

*Stefanía Traustadóttir.*

#### **Fylgiskjal.**

#### **SAMÞYKKT** **fyrir Byggðasamlagið Hulu.**

1. gr.

Félagið er byggðasamlag og heitir Hulu. Það byggir á 94. gr. sveitarstjórnarlaga nr. 138/2011. Varnarþing er í Vestur-Skaftafellssýslu. Starfsemi byggðasamlagsins fer fram í landi Ytri-Skóga í Rangárþingi eystra eða annars staðar eftir ákvörðun aðildarsveitarfélaga hverju sinni.

2. gr.

Aðild að því eiga Rangárþing eystra, Mýrdalshreppur og Skaftárhreppur. Aðildarsveitarfélög bera einfalda ábyrgð á fjárhagslegum skuldbindingum byggðasamlagsins en innbyrðis skiptist ábyrgðin samkvæmt stofnsamning þ.e. Mýrdalshreppur 40%, Rangárþing eystra 35% og Skaftárhreppur 25%. Önnur sveitarfélög geta orðið aðilar eftir ákvörðun stjórnar byggðasamlagsins og staðfestingu á aðalfundi.

3. gr.

Hlutverk Hulu er skv. stofnsamningi að annast urðun flokkaðs heimilissorps frá aðildarsveitarfélögunum, sem og öðrum aðilum á samlagssvæðinu, sem þess óska og ef stjórn Hulu samþykkir. Stjórn Hulu getur, að fengnu samþykki Rangárþings eystra, gert þjónustusamninga við aðra aðila, sbr. stofnsamning. Jafnframt getur Hulu, ef öll aðildarsveitarfélög samþykkja, haft umsjón með sorphirðu og annarri sorpförgun hjá aðildarsveitarfélögunum. Stjórn Hulu getur falið verktökum að annast framkvæmdir fyrir sína hönd og samið um gjaldtöku þess vegna.

4. gr.

Aðildarsveitarfélög tilnefna hvert um sig einn fulltrúa til setu í stjórn Hulu og annan til vara. Skipunartími stjórnarmanna skal vera eitt ár, milli aðalfunda. Stjórnin skiptir sjálf með sér verkum. Formaður stjórnar boðar til stjórnarfunda.

Stjórn byggðasamlagsins er heimilt að gera samning við aðra aðila um framkvæmd einstakra þátta þjónustunnar, m.a. við einkaaðila enda samrýmist þeir samningar lögum um þjónustuna og sveitarstjórnarlögum og rúmast innan fjárhagsáætlana byggðasamlagsins.

Atkvæði stjórnarmanna skulu vega jafn þungt við afgreiðslu mála í stjórn. Ákvarðanir á stjórnarfundum teljast samþykktar ef einfaldur meirihluti stjórnarmanna samþykkir þær.

Stjórnarfundur byggðasamlagsins er ályktunarhæfur þegar meirihluti kjörinna stjórnarmanna er mættur til fundar. Aðalfundur byggðasamlagsins er ályktunarhæfur hafi löglega verið til hans boðað

og meirihluti fulltrúa aðildarfélaganna, miðað við fulltrúa fjölda skv. 6. gr. samþykktar þessarar, er mættur.

Stjórn byggðasamlagsins getur ekki skuldbundið aðildarfélögin umfram það sem kveðið er á um í fjárhagsætlun byggðasamlagsins, eða í samþykkt þessari. Samþykki allra sveitarstjórna aðildarsveitarfélaganna þarf til að ákvarðanir byggðasamlagsins um fjárfestingar, meiriháttar eignabreytingar, ólögbundin útgjöld og skuldbindingar öðlist gildi.

5. gr.

Aðalfund skal halda fyrir lok marsmánaðar ár hvert.

6. gr.

Hvert aðildarsveitarfélag á rétt á að eiga tvo fulltrúa á aðalfundi og félagafundum Hulu og hefur hver fulltrúi eitt atkvæði.

7. gr.

Tillögur um breytingar á samþykkt byggðasamlagsins skulu berast stjórn þess í síðasta lagi þremur sólarhringum fyrir upphaf aðalfundar. Tillöguflýtyjandi skal jafnframt kynna öllum aðildarsveitarfélögunum tillöguna bréflaga með sama fyrirvara.

8. gr.

Ákvarðanir aðalfundar og félagafunda í byggðasamlaginu, löglega til boðaðra, eru bindandi ef einfaldur meirihluti fulltrúa eigenda samþykkir að undanteknum ákvörðunum skv. 10. gr. Samþykkt byggðasamlagsins verður þó aðeins breytt á aðalfundi með samþykki 2/3 hluta atkvæðamagns. Verkefni aðalfundar eru:

1. Skýrsla stjórnar og ársreikningar.
2. Ákvörðun um gjaldskrá fyrir aðildarsveitarfélög.
3. Ákvörðun um breytingu á samþykkt samlagsins, ef tillaga um það hefur komið fram með löglegum fyrirvara, sbr. 7. gr. Kosning endurskoðanda/endurskoðunarfélags.
4. Önnur mál.

Aðalfund skal boða með dagskrá. Alla fundi, þ.m.t. aðal-, auka- og stjórnarfundu skal boða með tölvupósti með a.m.k. sjö daga fyrirvara. Dagskrá stjórnarfundu skal berast stjórnarmönnum í síðasta lagi tveimur dögum fyrir boðaðan fund. Fundargerðir stjórnar skal senda aðildarsveitarfélögum til kynningar.

9. gr.

Hlutverk stjórnar er að hafa yfirumsjón með rekstri byggðasamlagsins. Stjórn skal í samstarfi við rekstraraðila urðunarsvæðisins gera tillögu að rekstrar- og fjárhagsáætlun byggðasamlagsins sem lögð er fyrir sveitarstjórnir aðildarsveitarfélaganna eigi síðar en 30. október ár hvert Reikningsár byggðasamlagsins er almanaksárið.

Stjórnin getur falið öðrum að annast daglegan rekstur Hulu fyrir sína hönd.

10. gr.

Kjósi aðildarsveitarfélag að ganga úr byggðasamlaginu skal það tilkynnt á aðalfundi. Úrsögnin tekur þó ekki gildi fyrr en um næstu áramót eftir að úrsögn er gerð kunn. Innan sex mánaða frá aðalfundi, þar sem úrsögn aðildarsveitarfélagsins er tilkynnt, skal halda aukafund aðildarsveitarfélaga að byggðasamlaginu. Á þeim fundi skal tekin ákvörðun um hvort byggðasamlaginu skuli slitið eða því haldið áfram með breyttri eignaraðild.

11. gr.

Samþykkt þessa skal endurskoða verði breytingar á eignarhaldi byggðasamlagsins eða aðrar þær breytingar sem kunna að hafa áhrif á framkvæmd hennar.

Til að slíta byggðasamlaginu þarf samþykki a.m.k. 2/3 hluta allra eigenda í því á löglega boðuðum fundi. Við slit á byggðasamlaginu ganga eignir þess og/eða skuldir til eignaraðila í hlutfalli við eignarhluta.

12. gr.

Samþykkt þessi öðlast gildi á aðalfundi byggðasamlagsins þann 20. janúar 2021.

*Samþykkt á aðalfundi stjórnar Hulu bs., 20. janúar 2021.*

---

B-deild – Útgáfud.: 14. júní 2021